



MISA CON NENOS
17 de febreiro de 2019
T. Ordinario - 6º C
S. LUCAS 6, 17. 20-26:
“Benaventurados os pobres. Ai de vós, os ricos”.



MENSAXE: Benaventurados os pobres e os famentos. Ai dos ricos e saciados!

1. ACOLLIDA

Irmáns e irmás: Cada domingo reunímonos, como crentes, para celebrar o amor de Deus na Eucaristía. No Evanxeo de hoxe Xesús dínos que quere que sexamos felices de verdade, e dános o programa das benaventuranzas como o camiño que nos conduce á felicidade auténtica. Ser felices, benaventurados, non sempre é fácil e ás veces sentimos a tentación de buscar só a nosa felicidade, esquecéndonos dos pobres, dos que pasan fame ou dos que choran. Aprendamos a lección: non busquemos o que a longo prazo nos entristece, senón o que nos faga felices de verdade.

(Saímos co cartel de Fano deste domingo)

No nome do Pai... *Que Xesús que veu consolarnos e ensinarnos o camiño da felicidade, sexa convosco.*

2. PERDÓN

Con frecuencia non buscamos o que nos dá a verdadeira felicidade, por iso pedimos perdón.

-Pola nosa pasividade ante o fame, a falta do necesario que viven millóns de irmáns nosos. **Señor, ten piedade de nós.**

-Porque con frecuencia quedamos só en bos desexos ou accións illadas, sen cambiar o noso estilo de vida insolidario. **Cristo, ten piedade de nós.**

-Pola nosa espiritualidade non comprometida nos problemas sociais do mundo. **Señor, ten piedade de nós.**



3. MONICIÓN ÁS LECTURAS

As tres lecturas que imos escoitar son unha invitación a poñer a nosa confianza en Deus. Na primeira escoitaremos como o pecharnos en nós mesmos produce esquecemento de Deus. Na segunda san Paulo recórdanos unha cousa importantísima: todo o que fagamos está moi ben, pero o máis importante é que Xesús Resucitou. E finalmente no Evanxeo, escoitaremos o programa que Xesús quere para a nosa vida, un programa de catro puntos que, de cumprilos, lévanos á felicidade. Escoitemos con atención.

4. PETICIÓNS

Porque nos sentimos débiles e necesitados, presentámoslle, ao Señor, a nosa oración dicindo:

-Que confiemos en ti, Señor.

- 1.- Polos que na Igrexa ocupan cargos de responsabilidade, para que escoiten a voz dos máis sinxelos. Oremos.
- 2.- Polos pobos que sofren a traxedia do fame, para que lles axudemos a alcanzar unha vida digna, como é o desexo de Deus. Oremos.
- 3.- Polos gobernantes da terra, para que promovan a xustiza e o desenvolvemento sostido. Oremos.
- 4.- Polos que habitamos esta terra marabillosa, para que a coidemos, non a destruíamos e loitemos polos dereitos de todos. Oremos.
- 5.- Por todos os que seguimos a Xesús, para que vivamos en harmonía coa natureza, coidémola, defendámola e consintamos como casa de todos. Oremos.
- 6.- Por nós, para que non poñamos o noso corazón no diñeiro ou no poder senón que o abramos a Deus. Oremos.
- 7.- Para que nos sintamos como árbores plantadas ao bordo do río coa sorte de ter fe en Deus. Oremos. *Ti que nos chamas a ser felices fai que nos apoiemos en ti e nos deixemos enchoupar polo teu Espírito. Por XCNS.*

5. OFRENDAS

CARTEL CON 4 PALABRAS (ricos, saciados, perseguidores, burladores)

+AI!: Señor nós queremos ir contracorrente á hora de buscar a felicidade, é dicir, queremos buscar en cada situación a túa presenza e fortaleza que ti nos dás.

UN CORAZÓN VERMELLO: Dános, Señor, un corazón de pobre, que non nos enchan as cousas materiais senón que teñamos fame de ti, que acudamos cada domingo á eucaristía porque necesitamos a túa Palabra e o teu Pan.

PAN E O VIÑO: Finalmente, co pan e o viño traemos a ofrenda que, coa túa forza e a túa poder, converterase nun momento feliz a Eucaristía: a túa presenza real e misteriosa na consagración. Acéptaos, Señor, e que nunca nos falte para seguir andando polos teus camiños.



6. VIDEOS 6º ORDINARIO-C

-Os benaventurados, reflexión: https://www.youtube.com/watch?time_continue=3&v=Lpuff6-Zr2A

-Lucas 6:24-42, película: <https://www.youtube.com/watch?v=gl0h11uWAjM>

7. SUXESTIÓNS:

-Dialogamos sobre o camiño de Xesús para ser felices e facer felices aos demais. Preguntámonos se é fácil ou difícil, se é o camiño que seguen os que vemos na tele ou nas redes sociais... Vemos que cousas nos atan e non somos capaces de compartir ou deixar.

-Dous nenos con mochilas reparten uns pergamiños que son o segredo para unha vida feliz: "CONFÍA EN DEUS". Repártenllos aos nenos para que llos entreguen aos seus pais, avós ou amigos.... Convén que sexan pergamiños pequeniños para que despois o poidan traer na carteira ou no peto.

-Poderíase comezar un diálogo evocando experiencias duras de enfermidade, de algo que che saíu mal, da morte dun ser querido, etc. e dicir ata que punto confiaches en Deus ou te enfadaches con el.

-Buscade en *youtube* a letra de "Benaventuranzas", unha canción do musical "33" sobre a vida de Xesús e comentádea.

-Nós debemos facer o que Xesús facía e por iso debemos estar cos pobres, axudándoos no que poidamos. Porque os cristiáns pensamos que todas as persoas son iguais e por iso, non hai dereito a que haxa persoas que non teñan para comer ou non teñan onde vivir. Esa é a nosa misión como Igrexa. Que se fai na túa parroquia polos pobres? Que podes compartir ti con eles ou con alguén que sofre por algo?



BENAVENTURANZAS

*Felices serán todos os que axudan,
socorren incendios, reparten o Pan,
lavan pés sen asco, salvan os náufragos,
feliz quen axuda, pois axudarano.
FELICES, SEREDES FELICES.
POR FIN A VIDA ILUMINARASE.
HASE ROMPER A TRISTEZA.
SODES MIL FACHOS QUE VAN ALUMAR.
O MUNDO RENACE. PODEDES CANTAR
QUE O AMOR, COMO A LUZ, HAVOS SALVAR.
QUE ES POSIBLE PARA TODOS
ENCONTRAR FELICIDADE.
QUÉROTE, QUÉRESME? TREMO POR TI, MEU AMOR.
QUÉROTE, QUÉRESME? TREMO POR TI, MEU AMOR.*

Musical 33

